



POLOAIGA FAALAVELAVE FAAFUASE'I NUMERA 62

TULAFONO FAAVAE O LE MALO TUTOATASI O SAMOA 1960 (MATAUPU 105/106)

O AU NEI, TUIMALEALI'IFANO VA'ALETOA SUALAUVI II, Ao o le Malo o Samoa, i luga o le fautuaga a le Kapeneta **FK (22) Faapitoa 03**, ma le **Mataupu 106** o le **Tulafono Fa'avae**, ou te faia ai nei **POLOAIGA**:

1. Femalagaiga Faavaomalo vaalele ma vaa a lalo:

(1) E tapunia femalagaiga faavaomalo.

(2) E faatagaina ona malaga mai i Samoa vaalele mo uta (cargo flights) e aumai ai uta (cargo) ma pasese e faamaonia e le Kapeneta, seia vagana ua toe faia iai se faaiuga a le Kapeneta.

(3) E faatagaina ona malaga mai i Samoa vaalele faapitoa Airforce (Airforce flights) pe a faamaonia e le Kapeneta mo:

(a) le auina mai o ni uta auupega malolosi;

(e) le auina mai o ni fesoasoani i taimi o faalavelave fa'afuase'i matuiā e aafia ai Samoa i se tulaga e tatau ai; po'o

(i) ni isi lava mafuaaga e tusa ai ma tulaga e tatau ai.

(4) Ua tapu le toe ulufale mai o soo se ituaiga vaa seia vagana ai:

(a) vaa oloa ma vaa suauu;

(e) nisi ituaiga vaa, e aafia ai vaa failā ma nisi, e faamaonia e le Kapeneta mo le utuina (refuel) po o ni isi tulaga e tatau a.

2. Faanofoesea

(1) E tatau i se pasese, pailate ma le auvaa e malaga mai i Samoa i se vaalele ona faatumu pepa faamaonia faale-soifua Maloloina e pei ona tuuina atu, ma sainia se tautoga faaletulafono tusitusia (declaration) pe na ia aafia muamua pe leai i le siama o le COVID19, ma faanofoesea pea taunuu mai

i Samoa mo aso e 21 po o se isi vaitaimi e faatonuina e le Faatonusili o le Soifua Maloloina i lalo o aiaia nei:

(a) i nofoaga ma aiaia e faamaonia e le Kapeneta atoa ai ma le totogi e le Malo mo na'o tagatanu'u Samoa o apitaga ua faanofoesea ai, taumafataga o le taeao faatasi ai ma le aoauli ae totogi e le tagata lava ia lana meatausami o le afiafi;

(e) le faanofoesea o tagata i o latou aiga i luga o aiaiga faatulagaina e le Pule Faatonu o le Matagaluega o Soifua Maloloina.

(2) Le faamalosia ona faanofoesea o frontline ma support staff e pei ona faatonuina e le Faatonusili o le Soifua Maloloina o loo galulue mo le puipuia o le faamai o le koviti i lalo o aiaia e pei ona fuafuaina e le Faatonusili o le Soifua Maloloina.

(3) Ua faatonuina le Matagaluega o le Soifua Maloloina ina ia matua faamalosia puipuiga mo tagata uma i lalo o le nei poloaiga.

3. Potopotoga i nofoaga faitele:

(1) E tapu nei ona toe tumutumu tagata i potopotoga poo nofoaga faitele.

(2) Le faamalosia o le nonofo o tagata uma i latou maota ma laoa sei vagana le aufaigaluega ua faataga mo le tuuina atu o le auaunaga moomia mo le soifua.

(3) Mo le saogalemu o tagata i lalo o lenei poloaiga, e tataua ona utagia aiaiga mo le puipuiga o le pipisi o le fa'ama'i o le Korona Vairasi 19 e pei ona fautuaina e le Matagaluega o Soifua Maloloina po o le National Emergency Operation Centre.

4. Femalagaiga faalotoifale:

(1) Ua tapu nei femalagaiga ma feoa'iga o pasi ma taavale.

(2) Ua tapu femalagaiga o vaalele ma va'a i totonu o Samoa.

5. Maketi, Faleoloa, Supamaketi ma Pisinisi:

(1) Ua tapunia uma maketi, faleoloa laiti ma supamaketi ma pisinisi uma.

(2) Mo le faatinoina o lenei poloaiga:

(a) o le "Supamaketi" e faatatau i fale oloa e faaoga faitotoa e ulufale atu ai

le tagata e fa'atau ai oloa (groceries ma isi);

(e) "faleoloa laiti" o faleoloa e le o iai ni faitotoa mo le ulufale o tagata ae tu le tagata faatau i fafo o le faamalama ma fai lana faatau.

6. Faatau oloa i magaala ma tafaala:

(1) Ua tapu ona fa'atau savali oloa i luga o le auala.

(2) E matuā tapu ona faatau savali e tamaiti e i lalo ifo o le 16 tausaga ni oloa i soo se taimi.

7. Faatauina o le Ava Malosi:

Ua tapu le faatauina o le ava malosi i soo se faleoloa (faleoloa laiti ma supamaketi) ma pa pia i totonu o Faletalimalo.

8. Aoga:

Ua tapunia uma aoga o le malo, Ekalesia, aoga tumaoti faapea Iunivesete ma aoga maualuluga.

9. Falema'i, ma'i, tausima'i ma siigama'i:

Ua matua tapu ona toe ulufale se tagata i soo se falema'i sei vaganā se faalavelave poo se gasegase fa'afuase'i.

10. Aiaiga mo galuega a le Malo:

Ua tapunia uma galuega a le Malo sei vagana ai auaunaga moomia mo le soifua (essential services).

11. Tiute o le Matagaluega o Soifua Maloloina:

Ia faatinoina e le Matagaluega o Soifua Maloloina le unaia o polokalame falauiloa o le puipuiga o le pipisi o le fa'ama'i o le Korona Vairasi 19, mo le nofo silafia o le atunu'u.

12. Malosia'ga o le Matagaluega o Leoleo:

Ua tuuina atu ile Matagaluega o Leoleo le malosiaga e faamalosia ai le mata'ituina o lenei Poloaiaga.

13. Malosiaga faapitoa o faauluuluga o Matagaluega:

(1) Ua tuuina atu le malosiaga i faauluuluga o Matagaluega ma Ofisa uma o le Malo, o loo iai ā latou malosiaga fa'aletulafono e faatino ai ia malosiaga faaletulafono, faapea ai, malosiaga o faauluuluga e faatino ai Fuafuaga Mamao a le Malo i le tali atu i le Korona Vairasi 19 (Response Matrix).

(2) E mafai e le Kapeneta ona faia Tulafono Faatonutonu poo tulafono laiti mo le faatinoina o gaoiga uma e Ofisa a le Malo mo galuega e tatau mo le soifua saogalemu o tagata, ma mo le tausiga o le nofo filemu.

14. Pepa faailoa o le Solia o se Poloaiaga Faalavelave Faafuasei:

(1) E mafai e leoleo ona tuuina atu le Pepa Faailoa o le Solia o se Poloaiaga i soo se tagata ua solia aiaiga o Poloaiaga ua faataoto i totonu o Poloaiaga mo Faalavelave Faafuasei.

(2) O Pepa Faailoa i lalo o lenei poloaiaga e tatau ona faamaonia e le Komesina o Leoleo.

(3) Soo se tagata ua tuuina atu i ai se Pepa Faailoa o le Solia o se Poloaiaga, e tatau ona ia totogi le sala tupe ua ta'ua i lea Pepa Faailoa, i totonu o le 24 itula talu ona tuuina atu iai le Pepa Faailoa.

15. Faasalaga:

(1) E solitulafono le tagata e lē usitaia Poloaiaga uma ua taua i luga seia vagana ai le poloaiaga 1, ma o faasalaga nei:

(a) sala tupe:

(i) mo tagata ta'itoatasi, \$200 mo le solitulafono muamua, ma le \$500 i aso ta'itasi e faaauau ai lea solitulafono; ma

(ii) mo faalapotopotoga faatulafono, \$5,000 mo le solitulafono muamua, ma le \$7,000 i aso ta'itasi e faaauau ai lea solitulafono; poo le

(e) taofia i lalo o le vaaiga a Leoleo e lē sili atu i le 3 masina; poo le

(i) taofia i lalo o le vaaiga a Leoleo ma le sala tupe i lalo o le parakalafa (a).

(2) E solitulafono le tagata e lē usitaia le poloaiga 1 ma o fa'asalaga e nei:

(a) mo tagata ta'ito'atasi o le sala tupe \$2000 ; ma

(e) mo faalapotopotoga faatulafono po'o se kamupani o le sala tupe e \$15,000 mo le solitulafono muamua ma le \$20,000 i aso taitasi e faaauau ai lea solitulafono,

(3) E solitulafono le tagata e lē usitaia tuutuuga mo le faanofoesea e faatonuina e le Faatonu Sili o le Matagaluega o Soifua Maloloina, ma e ono faasala i se sala tupe e \$2,000.00

(4) O le totogiina o se sala tupe atoa i lalo o lenei poloaiga, o le a lē molia ai se tagata i se faamasinoga o soligatulafono mo le faasalaga i lalo o le Pepa Faailoa o le Solia o se Poloaiga i lalo o le poloaiga 14.

(5) A faamaonia le solitulafono a se tasi i lalo o nei poloaiga i luma o se faamasinoga o soligatulafono, e mafai ona faasala i se sala tupe e le sili atu i le \$10,000 poo le fale puipui e lē sili atu i le 12 masina, poo faasalaga uma e lua.

(6) Mo so'o se pisinisi latou te solia Poloaiga 5 o lenei Poloaiga, o lea faaleaogaina laisene pisinisi poo laisene ava malosi faatasi ai ma faasalaga o loo i lalo o Tulafono o loo aiaia ai laisene pisinisi ma ava malosi.

16. Komiti Fautua - Mataupu 108:

O le Komiti Fautua ua faatuina i lalo o le Mataupu 108, e puipuia mai i ni tagi faaletulafono e ono tulai faasaga i le Komiti i le faatinoina o tiute fai i lalo o le Mataupu 108.

17. Tualumaga:

- (1) Mo le nofo sauniuni mo se tulaga ogaoga mai auga o lenei faamai Korona Vairasi-19, ia mafai ona faataatia ese Tulafono o tualumaga a le Palemene ma le Kapeneta, ina ia mafai ai pea ona faia ni faaiuga tatau mo le atunuu.
- (2) Mo faaiuga tatau, o poloaiga i luga e le taofia ai ni tualumaga faanatinati o le Palemene ma le Kapeneta i lalo o malosiaga o le Tulafono Faavae.

18. Faatupeina:

O le faatupeina o fuafuaga a le Malo i lalo o lenei Poloaiga e faatupeina mai vaegatupe talafeagai a le Malo.

19. Aloaia:

- (1) Mo le faatinoina o le poloaiga 1, o galuega uma na faatinoina mai le aso 21 Me 2020 e oo mai i le asō, e aloaia i lalo o aiaiga o lenei Poloaiga.
- (2) Mo le faatinoina o le poloaiga 7, o galuega uma na faatinoina mo le faatauina o le ava malosi i le vaitaimi o le Aso Maliu mai i le Aso 1 Aperila 2021 i le 10 i le po, seia pāia le Aso 3 Aperila 2021 i le 6:00 i le taeao, e aloaia i lalo o aiaiga o lenei Poloaiga.
- (3) O se taimi faanofosea na faatonuina e le Faatonusili o le Soifua maloloina e ese mai le 21 aso, o se taimi faanofosea e aloaia i lalo o aiaiga o lenei Poloaiga.


20. Fuafuaga o Faalavelave Tutupu Faafuasei:

O nei poloaiga e aofia i totonu o Fuafuaga o Faalavelave Tutupu Faafuasei (National Disaster Management Plan) e pei ona aiaia i lalo o le Tulafono o le Faafoga o Faalavelave Matuia ma Faalavelave Faafuasei 2007.

E soloia le Poloaiga Faalavelave Faafuase'i Numera 61 o le Aso 14 o Ianuari 2022 e amata mai i le taimi e faamamaluina ai leni Poloaiga Faalavelave Faafuase'i Numera 62.

O leni Poloaiga Faalavelave Faafuase'i Numera 62 e amata faamamaluina i le itula e 6 i le afiafi o le Aso 22 Ianuari 2022 seia aulia le 6 i le afiafi o le Aso 24 Ianuari 2022.

Sainia i le Aso 22 Ianuari 2022


(Tuimaleali'ifano Va'aleto'ia Sualauvi II)
AO O LE MALO